

膠澳租借始末電存

吾國與外人交綏基隆一役最有光於中外戰爭史合肥章鼎臣軍門高元以偏師殲強敵復要隘而乃成功不居調和湘淮此其智勇與氣識方諸古之名將帥亦何多讓余聞而敬慕竊作投筆想會公來鎮登州遂往依焉吾魯膠澳形勢險要一天然好軍港也癸巳秋北洋大臣李文忠公奏請公移紮青島修築礮臺乃臺工未竣而中東之戰事起矣章公告奮勇赴前敵甲午十月初共帶八營由登州飛渡遼東關外欽差某因公直言銜之奏請以我軍守蓋平危地臘月十五日黎明敵知公曾在臺灣戰勝法國有將略以全力來攻我軍殊死戰

相持一晝夜之久卒因衆寡懸殊左軍統領楊壽山及賈幫帶死之其餘各營將士大半傷亡遂至不支而徐邦道等受意來援竟以七十里行程趲趲三日欲不敗得乎是役也敵死傷甚衆雖敗猶榮今詢諸遼東父老尙津津樂道焉二十年冬回駐青島時清政府昧於外交權力之失不一而足獨中德邦交稱輯睦德人游弋青島當軸屢令嚴加保護詎伊包藏禍心藉口找德使事亦欲攫我軍港擴勢力於東亞二十二年十月十九日德人乘白皮軍艦二艘遠觀之係一白一黑比及入口始知該輪皆白色其一爲黑布所罩公當疑其有詐派員乘划往詢仍以游歷爲詞且共統兵四營已以半數分佈冬防處數百里之遙欲作備則兵單欲請兵則無詞且勢成遠水竟夕躊躇德兵突於次日

辰刻攜鎗礮蜂擁登岸有夏翻譯者操京語至操場謂 章公曰礮提督偕地操演有公文致貴軍門文中要求四十八點鐘退出青島不然以礮火相見論青島陸地歸山東轄海港純屬北洋東撫李公秉衡電令開仗北洋總督王文勤公文韶急電奏聞諭旨諄囑萬勿衅自我開當集營官幕友議決遵諭辦理我軍遂退而天然軍港爲德人完全佔領事變倉猝防不及防無論兵單不能一戰即使能戰違旨擅開兵端罪亦不赦其不敢冒然從事者籌之熟矣卽以他人臨之亦乏善策不知者難免不以怯懦見譏 公固不甘任受日久訛傳恐更失實當時一切電諭悉公面諭而培榮手製之爰付剞劂以白諸天下

蓬山 柳培榮謹識

膠澳租借始末電存

(章高元與當道往來電)

蓬山 柳培榮輯

十月十九日(光緒二十二年)

天津欽憲
濟南大帥

鈞鑒本日下午四點鐘到德國兵艦兩艘當即派員乘划往詢

知仍爲七月間奉總署諭令妥爲接待之棣提督來此游歷自應遵照
前諭妥爲保護惟此次並未奉有明文合併奉聞高元叩皓印

二十日

天津欽憲
濟南大帥

鈞鑒二十日早七鐘時德國棣提督藉鉅野仇教一案率領

德兵紛紛上岸分布各山頭後送來照會內開膠州一地限三點鐘將

駐防兵勇全行退出女姑口勞山以外只允帶大礮一事其餘軍火礮位概不准帶以四十八句鐘退清爲限過此卽當敵軍辦理等語高元當以未奉本國公文容卽轉電請示口頭答復查棣提督兵輪暫駐口外歷奉公文接待保護現在事變倉猝我軍兵單究應如何辦理請速電示遵行事機急迫盼切禱切高元叩智印

二十日午刻

急天津欽憲
濟南大帥鈞鑒今早德兵突然上岸已密電稟陳詎德兵登岸後立即分駐各要隘並挖溝架礮密密布置頃刻該提督又逼退軍不容稍緩高元親往面見該提督剴切告知未奉本國公文碍難擅離反復爭辯伊堅執不允併聲稱下午三句鐘率隊進營各等情元欲戰恐開兵端

欲退恐忝職守再四思維惟有暫將隊伍拔出青島附近青島山後四方村一帶扼要整軍據守以免彼此軍隊見面滋生事端轉貽德人口實元仍駐青島似此強霸不遜情理全軍公憤非戰不可聽候明諭開仗飛速至盼高元謹稟

二十一日督署來電（王文韶）

急急青島章鎮臺急電悉已電奏請旨此事無理可講勢難開仗只好相機辦理候奉旨再達韶簡印

二十一日山東撫署來電（李秉衡）

章軍門鑒智電敬悉德棣提督藉端尋衅斷非口舌所能了尊處四營務須堅諭勿動弟已電奏請旨擬調夏庚堂統領所部各營開拔赴膠